


Per cumiau da nies amitg Bruno Soliva

19.3.1983. 11.11.



Bruno ha stuiu murir, malgrad ch'el veva aucun pér 24 onns. Nus, ch'essan terresters, havein difficultads da capir ed acceptar quei fatg. E fussen nus aunc aschi cristians che s'orienteschian sin la veta da l'auter mund, dat ei certi muments che nies natural terrester serebaulza. E quei ei negina zanur. El niev testament legin nus che Cristus sez hagi stuiu bargir sin fossa da siu amitg Lazarus.

La mort ei in fatg crudeivel, mo per paucs deliberonts. Aschia para ei a nus carstgauns ch'essan aschi ligiai vid la veta. La mort disfa nossas vias, derasa ferdaglia malemperneivla. Nies poet, Sur Gion Cadieli, ha fatg a sias uras ina poesia sur digl unviern. Ella pudess esser adattada d'exprimer quell'atmosfera freida en vesta alla mort nuncapeivla dad in da nos amitgs.

Neiv e neiv!
Tut la pleiv
Fi de neiv curclada;
Gie perfin
Sin tgamin
Ei la setschentada.

Prau ed èr
E pumer
Sut la neiv suspira;
Buc in trutg,
Buc in dutg
Va tras la planira.

Senza neiv
Ella pleiv
Mo in liug s'engarta.
Nu'e quei?
O igl ei —
Ina foss'aviarta.

Tut suspira sut il buordi ch'ei tucca da purtar. Relaziuns caras ein devastadas, las vias interrutidas. Gie, aunc dapli: il carstgaun vegn en vesta alla situaziun en dubi sur dall'esistenza d'in 'trutg' che meina alla buna fin. Il poet capescha da dar a moda meisterila entras la foss'aviarta la vera ferdaglia e criuadad agl unviern e tras la detschartadad ed igl agir senza schanetg digl unviern la stgira dolur e criuadad alla fossa.

Il di, che Bruno ei morts, ha era la natira rinforzau en nus il sentiment che Sur Gion Cadieli tschaffa cun simbolica en sia poesia. Nos trutgs ein puspei inaga vegni disfatgs. Els ein tuttenina stai nunpassabels pli. Damondas sin damondas ein naschidas en mei, stend sper il letg da Bruno duront che la mort era vidlunder da clauder ad el ils egls. Damondas e damondas ein naschidas en tut quels che han carezau Bruno e che han stuiu accumpignar el aschi baul alla fossa. Schebein ils miedis hagien fatg in sbagl, laschond murir el per posta d'operar ina comba, era buca la damonda la pli pesonta. Na, las damondas suenter origin e destin dalla veta humana insumma ein quellas che peisan en tals muments.

Nus che cartein, havein bein survegniu ina risposta. Denton savens ei quella plitost mo ina risposta dil catechisse, ina risposta da pupi. Ei drova sforz e breigia da s'endisar vi da quella e viver ella. Al cartent vegn la veta gie buca prida, mobein mo midada. Vi da quella midada stuein nus s'endisar, en quella stuein nus seprofundar. Forsa ch'ei schabegia lu il miraculus: Quel, ch'era prius da nus, vegn puspei schenghegiaus a nus, e quei forsa en moda pli profunda e biala che quei che nus possedevan el avon ch'el banduni nus. El stat avon nus transformaus en las veras dimensiuns e qualitads dalla veta humana. Lein empruar da seprofundar en quella nova pusseivladad, dada al cartent.

Bruno mereta nies cauld engraziament. Jeu hai emprui d'enconuscher el sco giuven ruasseivel, adina promts per in survetsch ni l'auter. Era in agid necessaris per ina lavur ni l'autra en nossa missiun, savevel jeu nua sevolver. Ed il Segner ha empermess ch'el emblidi negins survetschs prestai, e fussen els aunc stai aschi pigns. La cardientscha en quella empermischun dat clarezia era alla fossa. Il Segner vegli remunerar Bruno per tut bien, fatgs per nus e per sia famiglia a Sedrun. Siu spért surventscheivel, siu humor e sia curtesia veglien semantener e viver vinavon en nus che vegnin in bi di a suandar el.

Ruauissa pia en paisch, Bruno, e procura vinavon per buna harmonia e spért da famiglia ellas retschas da nossa missiun romontscha, procura ch'ei vegni primavera tier nus che suspirein aunc sut il buordi dalla criuadad digl unviern sin santeri.

Tiu amitg Sur Giosch Albrecht